

四庫全書

史部

欽定四庫全書

王端毅奏議卷十四

明 王恕 撰

吏部

議在京三品官病故請給誥命奏狀

驗封清吏司案呈奉本部送吏科抄出左春坊左諭德楊守陞奏云云奉聖旨吏部看了來說欽此欽遵抄出送司案查先奉本部送該本官奏前事為查正統三年四月內纂脩宣宗皇帝實錄進呈節奉英宗白皇帝聖旨

陳循徐瑄王玉既丁憂且不陞欽此成化三年纂脩英宗皇帝實錄進呈節奉憲宗皇帝聖旨事故的罷欽此今次纂脩憲宗皇帝實錄進呈翰林院手本開纂脩該陞官員而有查有先年節奉欽依事故的罷事例不開外等因則知今次纂脩之陞官悉遵先朝之故事及查得成化三年纂脩事故官內一員副總裁禮部右侍郎李紹先於天順八年八月內開館成化二年八月內本官養病成化三年八月進呈在館二年去任一年不曾

陞官此其事故的罷之明驗也今右侍郎楊守陳品職并為副總裁俱與李紹同而在館之日比與李紹少去館之日比與李紹多本部所以不敢故違先朝事例與伊覆奏以此將奏詞立案訖今又奏前因案呈到部切緣自祖宗朝至今在廷文職大臣病故贈本身一官者間或有之贈及祖父母父母者絕無歷任三年請給誥勅者有例歷任未及三年病故請給誥勅者無例今楊守陳任三品官未及三年病故伊弟楊守陞為伊奏乞

贈官并請原任三品誥命封及祖父除請原任三品誥命封及祖父例難准理外所據贈官一事臣等未敢擅便定奪緣奉欽依吏部看了來說事理弘治四年十二月十八日具題次日奉聖旨是楊守陳贈禮部尚書欽此

扶持公道奏狀

文選清吏司案呈查得先該吏科等科都給事中等官張九功等題茲者法司會議論奏柳景秦紘之事陛下

於柳景念及祖功赦其死命俾得幅巾優游閑住於秦
紘則以奏事亦有不實免其運炭使之致仕且律條有
曰告二事以上重事告實輕事招虛及數事罪等但一
事告實者皆免罪今秦紘所言柳景之事輕重勘實不
止一端間有不實乃千百中之一二耳揆之律意固當
免罪況秦紘之舉乃風憲彈劾之公義非常人告訐之
私情雖曰有罪薄乎云爾揆諸情法尤可矜恕伏望皇
上俯念人才之難思秦紘盡心為國反遭擯黜之枉將

秦紘仍留辦事以慰在官等因具題俱奉聖旨秦紘已
發落了不准該衙門知道欽此欽遵抄出到部已經立
案訖續該南京六科給事中倪天民等十三道監察御
史楊璉等與夫肇慶府同知張吉亦論奏其事文雖殊
而意則同俱奉聖旨該衙門知道欽此欽遵抄出送司
案呈到部臣等竊惟帝王之治天下惟賞與罰最為緊
要當則人服否則不服其可忽哉叅看得都給事中等
官張九功等所上五章極言柳景秦紘之情罪與夫朝

廷所以處之者是非了然欲望朝廷召還秦紘以正賞
罰以為勸戒陛下宜從而未之從者是臣等不能贊襄
以成陛下納諫之美罪莫大焉今柳景該追賊又蒙聖
恩免之矣而恩獨不及於秦紘則是為地方軍民之害
者可恕而除地方軍民之害者不可用其何以服人心
而勵將來豈不大可惜乎伏望陛下從天下之公論召
還秦紘或處之都察院或處之南京都察院俾之視事
未必無補如此則賞罰攸當舉措得宜而人心服將來

勸矣不然則非臣等所敢知也伏乞聖明裁察幸甚緣
係節奉欽依該衙門知道事理未敢擅便弘治四年十
二月二十四日具題二十七日奉聖旨南京戶部尚書
黃紱改南京都察院左都御史秦紘着做南京戶部尚
書欽此

乞休致奏狀

臣陝西三原縣人年十三始入縣學二十六而中鄉舉
三十三而登進士改庶吉士三十四除大理寺評事尋

陞寺副五年而陞知揚州府又六年而陞江西右布政使又四年而陞河南左布政使未踰年而陞右副都御史撫治流民又二年以平賊功陞左副都御史巡撫河南未幾陞南京刑部左侍郎管部事改刑部總理河道又改南京戶部管部事復改左副都御史巡撫雲南陞右都御史改南京右都御史叅贊機務陞南京兵部尚書叅贊如故既而改兵部尚書兼左副都御史巡撫南直隸蘇松等處復改南京兵部尚書叅贊機務九年秩

滿陞太子少保仍舊管事成化二十二年致仕二十三年皇上嗣登寶位之初召臣為吏部尚書加太子太保今又五年矣臣自入仕至今四十四年荷列聖莫大之恩官至一品誥贈三代榮幸無加捐生莫報但犬馬之年今已七十有七矣委實筋力衰弱不能趨走承事神思昏倦難以旌別淑慝雖請託路絕奔競風息然已用者未必皆遂意未用者未必皆無言第恐積毀日深不能保終有辱召命伏望皇上少賜矜察放臣歸田另選

碩德重望之人代臣非惟使臣老來安恬以待終必能
薦引羣賢羽翼以成治矣臣無任懇切隕越之至等因
弘治五年正月十六日具奏次日奉聖旨卿居重職當
勉副委任勿以老辭吏部知道欽此

論御醫王玉不當陞俸奏狀

文選清吏司案呈奉本部送吏科抄出太醫院御醫王
玉奏云云等因具奏奉聖旨該部看了來說欽此欽遵
抄出送司案呈到部查得成化二十三年九月內該科

道官陳言該本部查處具題節該奉聖旨太醫院堂上官照額挨次存留院使施欽開來看欽此欽遵續該本部照額挨次存留院使施欽院判任義章淵三員其餘左通政張倫左叅議丘鈺院使仲蘭錢鈍院判劉文泰汪智許觀莊元金璽李思勉施鑑陳公賢徐生黃綬孫泰潘澤王玉共一十七員俱係額外官員等因具題節該奉聖旨是太醫院額內的僉書額外已降的罷汪智李思勉致仕張倫降院判其餘降御醫都各供事欽此

欽遵彼時王玉丁憂在家其後起復到部違限年久本部欲送法司問罪題奉聖旨王玉違限年久本當送問且饒他著復御醫辦事欽此欽遵又查得先該禮科等衙門給事中等官孫珪等題稱御醫等官王玉等四員丁憂去訖無憑考察該本部題准候各官起復到部仍行給事中等官會同考察續據吏目朱戡等奏要免考本部為照各官俱係題奉欽依該考人數難准免考等因具題節該奉聖旨丘鈺王玉朱戡已復原職并吳英

都免考欽此欽遵又查得太醫院以脩省改正為由欲復革罷傳奉官陳俊宮良寧銓吳綬聶整朱俊等舊職臣等以為若復陳俊等官則其餘傳奉革罷者皆來奏擾再三陳奏不可皇上竟將陳俊宮良寧銓吳綬陞授御醫訖今王玉奏稱曾在春宮効勞與陳俊等事體相同要復院判且太醫院額設院使一員院判二員成化年間濫設數多皇上嗣位之初遵依舊制存留院使一員院判二員見今不缺今王玉又要陞授院判則是一

欲遂已私不顧有壞成命況太醫院官以脩合藥餌治療疾病為職事前項降除御醫者誰非効勞之人若復王王一人之官則其餘人等必來奏擾不與覆奏彼必怨怒造言謗訕無所不至與之覆奏則冗官仍復如前有累陛下初政天下公論必謂臣等阿諛竊祿不能匡輔有何顏復立於朝設若院判有缺而王玉名在同降衆人之末計其資望考其藝術未必超越衆人亦難輒憑所奏就與陞授所據御醫王玉既蒙聖恩免其送問

又免考試自合黽勉盡職以圖報稱今却不安職分希求陞授於理不可論法難容欲將本官拏送法司究問以警將來緣奉欽依該部看了來說事理及係京官未敢擅便弘治五年二月初九日具題次日奉聖旨王玉免送問陞俸二級以後再有奏擾的送問不饒欽此臣等竊惟賞罰者天下之公所以勸善而懲惡也是賞罰也君主之臣輔而行之君欲賞一人罰一人合天下之公論為臣者能贊襄以成之使天下之善者以勸惡者

以懲斯人也非良臣乎君欲賞一人罰一人不合天下之公論為臣者不救正而阿徇以成之使天下之善者不勸惡者不懲斯人也非佞臣乎今陛下以堯舜之德居堯舜之位故臣等欲效良臣而不願為佞臣也且御醫王玉粗通醫術行不過人由傳奉而陞院判人多不平陛下嗣大位之初降為御醫物議稍息茲者謀復院判臣等論之如前陛下若依臣等所言將本官拏送法司問罪是為懲有罪乃法之正也免其送問是為宥有

罪猶之可也今既免其送問又陞俸二級是為賞有罪
奚可乎哉若臣等不言後來如王王者臣等又行送問
其何以服彼之心其何以服天下人之心欲天下不謂
臣等為佞臣得乎然佞臣固非臣等所願為亦非陛下
所以望臣等也伏望聖明俯察芻蕘之言收回陞俸之
命令王王仍照今職辦事庶可以服天下人之心且使
後來如王王者不待叅問而自不來奏擾矣臣等惓惓
為國之心不自知其言之狂也罪該萬死伏惟聖慈俯

賜矜察幸甚弘治五年二月十二日具題次日奉聖旨
你每既這等說王玉著仍照舊辦事欽此

論嚴考課以定黜陟奏狀

考功清吏司案呈照得在外有司官三年六年考滿赴
部給由考覈不分稱職不稱職俱引奏復職候九年通
考方定黜陟九年之內二考稱職一考平常從稱職二
考稱職一考不稱職或二考平常一考稱職或稱職平
常不稱職各一考各俱從平常二考平常一考不稱職

從不稱職繁而稱職無過陞二等繁而平常無過陞一等簡而稱職與繁而平常同簡而平常無過本等用不稱職初考繁處降二等簡處降三等若有過又各有降等之例此我朝祖宗以來考課之成法即唐虞三載考績三考黜陟之盛典也又查得本部奏行事例除邊方軍馬錢糧緊急所係官員考滿申請定奪外其餘不係邊方大小官員務要依例給由雖有專差責占三年六年之間亦要一次赴部考覈不許托故違者究問又該

南京吏部尚書王僎等奏該本部議擬題准除雲南等處地方寫遠有司大小官員照舊赴本布政司給由其餘去處三年六年考滿官員俱要依例赴部給由考覈不許仍前一概令其申請已經通行遵守外近該福建閩縣知縣周天民福建延平衛經歷司知事方杲四川平夷長官司吏目劉海河南布政司理問所提控案牘馬成三年六年俱不給由九年方纔赴部給由公文內雖開有本管上司衙門存留管事緣不係軍馬錢糧曠

要事情故違奏准雖有專差責占三年六年亦要一次
赴部考覈事例雲南富民縣知縣文茂三年六年不依
例赴本布政司給由亦屬有違除將案牘馬成先已呈
堂送問外所據周天民等呈堂送問間遇蒙弘治五年
三月初八日大赦宥免切緣近年以來九年考滿官員
到部中間有稱三年六年遇例納米者有稱本管上司
存留管事者輒憑九年一考考覈詞語定擬該陞該降
品級殊乖前項二考一考從稱職從平常從不稱職定

擬陞降之法案呈到部叅照知縣等官周天民等三年六年違例不行赴部給由罪名雖經恩宥緣各官止是給由一次若與給由二次三次一體陞用不無勤怠不分何以警戒將來合無將知縣等官周天民等數內繁稱者止陞一級簡稱者本等用繁平常者本等用簡平常者降一級仍通行浙江等十三布政司并南北直隸府州等衙門有司大小官員知會今後務遵前例三年六年俱要赴部給由雖有專差責占三年六年亦要一

次赴部給由違者送問仍照周天民等事例定其該陞
該降品級若有例前納米曾經繳報牌冊到部者不在
此限其雲南所屬官三年六年不行赴本布政司給由
不繳牌冊到部亦照此例發落如此則黜陟有所分別
而選法均勤怠知所警懼而治功成矣緣係定奪考績
黜陟事理未敢擅便弘治五年三月十三日具題十五
日奉聖旨是欽此

定奪兩廣朝覲官奏狀

考功清吏司案呈奉本部送吏科抄出欽差總督兩廣
軍務兼理巡撫都察院右都御史閔珪題云云等因具
題奉聖旨吏部知道欽此欽遵抄出送司照得弘治六
年正月初一日天下諸司衙門官員例該朝覲本部已
經題准通行遵守去後今該前因案呈到部檢照諸司
職掌內開凡在外官員三年徧行朝覲其各布政司按
察司鹽運使府州縣及土官衙門流官等衙門官員帶
首領官吏各一員名理問所官員照依到任須知依式

對欸攢造文冊及將原領勅諭諸司職掌內事蹟文簿具本親齎奏繳以憑考覈此祖宗以來之舊制也成化十七年朝覲該總督兩廣軍務兼理巡撫都察院右都御史朱英咨稱兩廣地方廣濶賊情難料要將府州縣官吏存留管事本部依擬題准行令廣東廣西二布政司各令堂上掌印官各帶首領官一員來朝其所屬府州縣并土官衙門俱留在任撫治將須知文冊送布按二司來朝官齎繳弘治三年朝覲該總督兩廣軍務兼

理巡撫都察院右都御史屠滸題要免兩廣府州縣官
來朝本部題准行令兩廣布按二司掌印官并首領官
及各府正官各帶該吏來朝止免州縣官來朝訖今總
督兩廣都御史閔珪又照前具題若不分地方有無賊
情一概存留府州縣官吏在任管事則以後朝覲之年
焉知各處不照此具奏若依所奏就行准理則朝覲之
典不幾於廢乎且有道之世太平之時豈可廢朝覲之
禮使上下之情不通庶官賢否無所旌別功過無所考

覈可乎合無行移都御史閔珪再查所奏前項地方如
廣西柳慶桂林等府見今用兵廣東翁源河源等縣接
連湖廣福建俱有賊情并有災傷去處府州縣官員俱
各存留在任管事將該進須知文冊申送布按二司堂
上掌印并首領來朝官吏帶來齎繳其餘無賊情無
災傷去處府州縣官吏俱要隨同布按二司官依期來
朝緣係存留朝覲官員及奉欽依吏部知道事理未敢
擅便弘治五年三月十七日具題次日奉聖旨是欽此

乞休致奏狀

臣先任太子少保南京兵部尚書叅贊機務成化二十二年致仕二十三年皇上嗣登寶位之初遣使齎勅召臣至京陞吏部尚書加太子太保臣自知菲材不能勝任已嘗再三乞恩辭免不蒙俞允不得已然後就職至今五年之間請老之章又十有八上矣俱蒙皇上溫詔慰留不從其請但臣今年七十有七筋力衰憊精神昏耗雖勉強盡職焉能保其無虞況銓選人物尤為難事

使明哲之士居此地位尚不能得人人歡心如臣之愚
焉能使人人而悅之又況臣賦性戇直不能周旋人事
平居無事人尚訾議少有間隙則羣起而排擠之遂成
過愆此臣之所以日夜恐懼不敢久居於此也伏望聖
恩憐臣衰老容臣歸田俾得無事蓋棺斯為萬幸臣無
任惶怖之至等因弘治五年四月二十二日具奏次日
奉聖旨卿朝廷老臣當勉副任用不允休致吏部知道
欽此

激勸賢勞官奏狀

考功清吏司案呈奉本部送准戶部咨云云案呈到部臣等切惟國家之大計莫重於稅糧稅糧之先務莫重於京邊今山東布政司弘治四年分起運京邊稅糧動以數十萬計而草束布花農桑其多稱是纔及次年四月初旬俱已完獲通關若非叅政熊繡聞望素能服人才能足以濟事安能致部屬官民趨事如此之速耶比之其他布政司怠事官員稅糧拖欠五七年久者優劣

勤惰相去遠甚况聞本官徵催之際不疾不徐靡苛靡刻而事自集此尤見其為良有司也且本官非止一事之優及訪知本官操履清白志行真純似此賢勞官員理當旌擢如蒙乞勅吏部再為查審本官如果平昔履歷與臣等所保相符量為照例旌擢庶使賢能者知所勸而怠惰者知所勉矣緣係激勸賢能官員事理未敢擅便弘治五年四月二十八日本部尚書葉淇等具題次日奉聖旨是欽此欽遵擬合通行除外備由移咨貴

部煩照本部題奉欽依內事理欽遵施行等因到部送
司查得熊繡年五十二歲湖廣都司寧遠衛軍籍原籍
江西南昌府豐城縣人由進士歷陞知府於弘治三年
九月內陞授前職十二月二十五日到任歷俸年半不
曾赴部給由案呈到部竊惟唐虞之世考績於三載之
後黜陟於三考之餘故絲之治水九載績用弗成然後
治其罪禹之治水九州攸同四隩既宅然後賞其功迨
至我朝考績黜陟亦用此道雖近來舉行旌擢之典亦

必待其所舉之官歷任三年之後曾經考稱無過覆勘
果有卓異政蹟然後施行未嘗有歷任未及三年就行
旌異者今熊繡以知府而陞叅政甫及年半雖完前項
糧草是乃職分當為似難輒便旌擢合無待候本官三
年考滿考稱任內著有卓異政蹟覆勘是實然後量與
旌擢如此則朝無濫及之恩官無苟且之政人知所勸
而治功成矣緣係旌擢方面官員事理未敢擅便弘治
五年五月初十日具題當日奉聖旨是欽此

議大學士丘濬建言奏狀

文選清吏司案呈奉本部送准禮部咨禮科抄出太子
太保禮部尚書兼文淵閣大學士丘濬奏云云等因具
奏奉聖旨這本所言止印經節賞賜停織造杜塞希求
陞官等項皆切中時弊該衙門看了來說欽此欽遵抄
出移咨送司除止印經節賞賜等項隸別部掌行外內
杜塞希求陞官四事係本部掌行案呈到部查得先該
內官監官奏言脩築蘆溝河隄岸要將文思院等衙門

副使潘俊把總曲興等量加陞職本部以為朝廷置文
思院官并把總人匠無非為營造計也今副使潘俊等
脩築蘆溝河隄岸工完雖曾效勞是乃職分之所當為
非分外事也只可量加賞賚以酬其勞恐不可陞官以
開弊端等因具題奉聖旨是潘俊等不准陞都加與賞
賜欽此續又該內官監題稱脩築正陽門等城垣河橋
工完要將冠帶掌作把總并天文生醫士及催工官尚
禮等量加俸級等因本部為照蘆溝橋工完官匠人等

既奉欽依不准陞都加與賞賜所據脩築城垣河橋把
總尚禮等似難量加俸級合無照依前例量加賞賜以
酬其勞等因具題節該奉聖旨冠帶把總尚禮王友道
王猪兒杜鑑羅祥與做軍器局副使王福董璣耿福汪
寬朱顯都與冠帶欽此本部又言前者脩蘆溝河隄岸
管工副使潘俊等既有聖旨不准陞都加與賞賜今脩
城垣冠帶官尚禮等却降前項陞職之旨是功同而賞
異也伏望收回前旨將尚禮等亦量加賞賜等因題奉

聖旨尚禮等既陞職冠帶了罷欽此本部又題若以為已陞了不可改亦望聖明留意今後內外官員但有似此為人奏討陞官有壞名器者許科道官叅奏拏問等因題奉聖旨這以後事朕自有處置欽此又該本部議得今後一應人員不許營求內外權要之人奏乞陞職其內外權要之人遇有書辦等項官員有缺聽本部於資格相應人員內擬奏除授不許坐名奏討其書辦等官三年六年考滿務令照例赴部給由考覈以憑黜陟

不許奏乞量陞職事違者並聽本部叅奏就將所舉之人拏送法司問罪不分原有官無官俱發回原籍為民當差舉主一體治罪等因具題奉聖旨是今後一應人員不許營求內外權要冒濫陞職違了的治罪不饒欽此今太子太保禮部尚書兼文淵閣大學士丘濬所言前四事誠為國為民之至計實兼法語巽與之雅言孔子曰法語之言能無從乎改之為貴巽與之言能無說乎繹之為貴陛下覽前言輒降俞旨可謂從且說矣

矧人多頌陛下好問好察如帝舜改過不吝如成湯烏有不改且繹乎今後內外臣隣如有為人求官陞職如丘濬所云者請以丘濬之言而諭之止之則官不及私昵祿不至濫費國不受其弊民不受其害萬萬年太平之基業可悠久而不拔矣萬一聖情重違其請而許之臣等則當謹執前項旨意與夫丘濬之言陳奏陛下俯賜優容而矜允之則恩在陛下而怨在臣等矣臣等居其位食其祿任其事死且不避而怨敢辭乎伏惟聖明

留意宗社幸甚天下幸甚緣係節奉欽依該衙門看了
來說事理未敢擅便弘治五年五月十二日具題次日
奉聖旨是欽此

議經歷高祿陞官奏狀

今日早朝退錦衣衛官召吏部堂上官臣恕偶有微恙
不能朝叅臣悅臣經趨至左順門有司禮監太監覃昌
說稱皇上欲著通政司經歷高祿陞本司叅議臣悅等
回說無缺又無憑據難以奉行臣悅等回至部中與臣

恕備說前情臣等仰惟皇上寬仁厚德為天下國家之心無以加矣眷顧親戚之恩亦無以加矣高祿乃皇親壽寧侯之妹夫欲為通政司叅議也非一日矣然而持久而不與者蓋恐來天下之物議累莫大之聖政故爾今日欲與之者恐非陛下之本心且高祿由舉人出身使其安於其職歷年深養望久遇有缺然後陞人自服彼亦安今本官歷任未及三年驟陞是職何以服天下之心杜天下之口是欲臺舉本官反累本官也有何益

哉伏望皇上以天下之官待天下之士若為親戚而妨
公議使天下後世得以窺其淺深非陛下之所願亦非
臣等之所願也臣等待罪銓司忠誠為國不自知其言
之狂妄而激切也死罪死罪惟聖明優容而矜察之幸
甚弘治五年五月二十三日謹具題知

議御史徐璘簡賢能以養人材奏狀

文選清吏司案呈奉本部送准禮部咨禮科抄出南京
雲南道監察御史徐璘奏云云等因具奏奉聖旨該衙

門知道欽此欽遵抄出送司案呈看得御史徐璘所奏
除防奸弊以杜奔競本部另行外所據簡賢能以養人
材係隸吏部掌行抄單移咨送司案呈到部看得監察
御史徐璘奏稱簡賢能以養人材一節固為有理但除
授州縣正官除進士外其餘聽選監生不分舉人歲貢
與夫乞恩遇例出身者一體考選在於前列者然後除
授正官間有一二不稱之人難以一概將歲貢乞恩遇
例者棄而不用且如吳寬曾彥其始也俱由歲貢入監

其後俱中狀元豈可謂歲貢監生中間全無人乎且人之才性不同有優於學問而劣於政事者亦有長於政事而短於學問者亦有有學問而不能提調學校者有寡學問而能提調學校者世無全才故人之於事有能有不能且各處歲貢生員俱係在學年深有科舉五七次不得中式者提學官考試見其頗通文理又不可黜退有五十以上方得應貢者亦有六十以上貢來者如此之人使其坐監十無一二得官所以多願就教職今

欲止用未及五十者為教職則前項五十以上歲貢生員多無路出身況未及五十者數少又多不願就教職且每科副榜舉人亦多不願教職此教官缺多所以不得不於願就教職歲貢生員考選本官前項處置若科目出身并歲貢生員未及五十者數多固可行之今科目出身并歲貢生員未及五十者數少雖欲行而自不能其言提調學校官今後務要遍歷考試不許提取會考越境迎接等項合無行移都察院轉行南北直隸提

調學校監察御史并浙江等處提調學校副使僉事務
要遍歷府州縣學考試生員不許任意提取數學生員
會於一處考試按臨地方務要預先移文禁止迎送不
許出郭若有自謂生徒樂從不行禁止縱令迎送百里
之外以致下情不堪士風向薄許巡撫都御史巡按御
史劾奏究治緣係陳言及奉欽依該衙門知道事理未
敢擅便弘治五年六月初二日具題次日奉聖旨是欽
此

議進士石存禮除官奏狀

照得目今六月本部大選官員取到三甲進士內一員
石存禮年二十二歲山東青州府益都縣人照依甲第
次序本官該選知縣臣等竊惟知縣乃一縣之主百責
所萃生民休戚係焉非年少力弱者所能勝任查得舊
例中副榜舉人俱除教職中間有年未及二十五歲告
願不就教職者准送國子監讀書二十五歲以上不願
就教職者不准仍除教職蓋以未及二十五歲者年少

未可為人師範故准令不就教職况知縣比之教職責
任尤重今石存禮年方二十二歲氣質清秀形體孱弱
若除授知縣使之宰百里之地居羣僚之上督率衆職
分理庶務加以送往迎來承上接下勞苦百端恐不能
堪看得行人司行人亦係三甲進士該除官員其職最
簡而無勞事欲將石存禮仍送該衙門辦事候有行人
員缺另行除授行人使本官讀書進學日省月脩待其
老成然後授以任事之職斯可責其成績緣係處置選

用年幼進士事理未敢擅便弘治五年六月初八日具題次日奉聖旨是欽此

議御史馮玘圖治奏狀

驗封清吏司案呈准兵部武選清吏司手本奉本部連送該本司案呈准職方清吏司手本奉本部送兵科抄出巡按貴州監察御史馮玘題云云等因具本奏奉聖旨該部看了來說欽此欽遵抄出送司案呈到部看得所奏四事內處置邊患等三事本部徑自查奏外其馴

服土官一事內宣撫宣慰長官把事等官本部議奏其
知府知州巡檢文職等官係隸吏部掌行連送該司仰
行吏部該司呈堂徑自查照施行等因到司查得土官
赴京襲職固自舊例亦有鎮守總兵等官保勘明白具
奏就彼冠帶承襲者又有赴京具奏有人爭襲發回保
勘者又有到京為無保勘公文發回病故者又有到京
查無會奏緣由發回候會奏至日另行本人奏稱情願
在京聽候者天順八年三月初二日節該欽奉詔書內

開雲南貴州廣西湖廣四川土官今後有告襲者委官
務要從公體勘定名會奏該部行令就彼冠帶襲職不
必叅駁中間如有徇私不公許巡按御史糾舉罪坐原
勘官員欽此欽遵外今該前因案呈到部看得監察御
史馮玘奏要令土官子孫循舊例赴京襲替亦可馴服
其心一節其意固善但土官衙門設在極邊地方襲替
往迴動經萬里中間貧富不一盤費艱難及至京師承
襲有保勘不明會奏未到又有被人爭襲駁回保勘累

年不得承襲如前所云者亦有被無藉之徒指稱官府
使用誑騙財物靡所不為以致遠人受其陷害衙門被
其玷污是以朝廷洞察斯弊特開恩例免其來京委官
從公體勘定名會奏該部行令就彼冠帶承襲是乃懷
柔遠夷革弊省事之良法若依監察御史馮玘所奏令
其赴京承襲俾知朝廷之盛自足以消其邪心恐邪心
未消而前項於彼不便之事有所不免不如仍照詔書
事例令其保勘明白奏來就彼冠帶承襲為便合通行

貴州等布政司今後土官子孫襲替保勘明白仍照詔書恩例行令就彼冠帶承襲到任之後如遇總鎮巡撫巡按三司分巡分守及一應上司官員到彼俱要與同流官叅見其總領等官亦要諭以朝廷恩威使之各懷忠順之心撫治夷民辦納糧差如或生事擾害地方國法具存決不輕宥緣奉欽依該部看了來說事理未敢擅便弘治五年六月二十日具題次日奉聖旨是欽此

王端毅奏議卷十四

欽定四庫全書

王端毅奏議卷十五

明 王恕 撰

吏部

議致仕尚書胡拱辰請給誥命奏狀

驗封清吏司案呈准禮部儀制清吏司手本奉本部連送該本司案呈奉本部送禮科抄出南京工部致仕尚書胡拱辰奏云云等因具本奏奉聖旨該衙門知道欽此欽遵抄出送司案呈到部看得本官所奏除乞恩入

監本部另行外所據乞賜誥命係隸別部掌行合就連
送仰行吏部該司呈堂徑自施行等因到司案呈到部
查得成化二十二年三月內該本官奏為乞恩休致事
本部查得本官歷官中外四十八年始終清慎年已七
十例該致仕題奉憲宗皇帝聖旨胡拱辰既歷官清慎
不准致仕著用心辦事欽此成化二十三年正月南京
尚書等官被劾者五員餘皆冠帶閑住獨胡拱辰得致
仕於此有以見先帝知本官之清慎故其所以優之者

與衆不同也況本官致仕止因年老別無異議觀此奏
詞則其雖老不衰可知又況本官歷任中外五十餘年
始終一節有功無過是亦聖世希有之人爾兼且本官
陞正二品俸二十五箇月有餘陞尚書又三十一箇月
有餘止因尚書欠三箇半月未滿一考未曾請給誥命
榮及先世以歷二品俸論之實滿一考又多二十餘箇
月今本官懇乞聖恩憐憫給賜尚書誥命欲恩及其父
祖以滿臣子之至願緣係致仕大臣乞恩請給誥命事

理臣等未敢擅便定奪伏乞聖裁弘治五年六月二十日具題次日奉聖旨與他欽此

議都御史高崧乞全體統奏狀

文選清吏司案呈奉本部送吏科抄出巡撫貴州都察院右僉都御史高崧奏云云等因具奏奉聖旨吏部知道欽此欽遵抄出送司案呈到部洪惟我朝太祖高皇帝創業垂統內設五府六部都察院等衙門外設都布按三司以及府衛等衙門即周官所謂六卿分職各率

其屬以倡九牧阜成兆民之制內外體統豈容紊亂又
大明律有曰凡奉制命出使而官吏毆之杖一百徒三
年罵詈杖一百蓋以上命為重初不計其官之崇卑也
以體統論之都御史則統攝乎布政而布政固其屬也
以奉使論之都御史奉命出使布政職守一方當致敬
盡禮況都御史高崧齋捧爾書巡撫貴州而其境內官
無大小皆當受其約束政無鉅細皆當聽其處分今布
政劉元自恃小才罔知大體乃敢輕侮都御史高崧言

語不遜則是壞朝廷之紀綱亂內外之體統本當叅究
但事在革前欲將劉元改調別任緣今地方多事合無
姑且不動本部類行貴州布政司轉行左布政劉元今
後務要改過自新安分守禮敬脩職業毋得越禮犯分
眇視制使自速罪愆仍行都察院轉行都御史高崧亦
要振肅紀綱以禮自防行事之際尤當顧大體毋得避
小嫌今後劉元如仍侮慢自賢不聽約束阻壞行事明
白奏來以憑拏問緣奉欽依吏部知道事理未敢擅便

弘治五年六月二十五日具題次日奉聖旨是欽此

議給事中王綸汰冗官以除民蠹奏狀

考功清吏司案呈奉本部送禮科抄出本科給事中王綸題云云等因具題奉聖旨該部知道欽此欽遵抄出送司案呈到部看得在外有司官員中間奉公守法盡心所事者少貪婪不才老懦無為者多誠如給事中王綸所言但各該巡撫巡按等官問發為民及考察黜退者日不足而月有餘物之不齊物之情也在人亦然黜

退一番後來者未必皆得人亦不過如此况今朝覲在
邇又該考察地方灾傷之際固宜祛民蠹除民害尤當
節民財省民力若又行令巡撫巡按考察官員雖欲不
驚擾自有所不免矧送往迎來送舊迎新未免勞費合
無不必行各該巡撫巡按官員考察候朝覲之日照例
本部會同都察院從公考察大明黜陟惟復依王綸所
言行被災地方巡撫等官會同考察量為黜罷緣係陳
言處置灾荒及奉欽依該部知道事理未敢擅便弘治

五年八月十五日具題次日奉聖旨是這考察不必行
欽此

論太監黃瓚乞留弟在京辦事奏狀

文選清吏司案呈奉本部送內府抄出內官監太監黃
瓚題云云等因具題奉聖旨吏部看了來說欽此欽遵
隨該吏科叅看得先該吏部題奉聖旨是今後一應人
員不許營求內外權要冒濫陞職違了的治罪不饒欽
此欽遵外今泉州府陰陽學正術黃碧公差到京乃敢

黃緣太監黃瓚奏求京職事屬有違宜從抄行通行送
司案呈到部叅照福建泉州府陰陽學正術黃碧解紙
到京太監黃瓚奏要對品存留在京辦事該吏科叅出
前因臣等竊惟朝無倖位則食之者寡此先儒之格言
經國之要務也且內外百執事俱有定員缺一員補一
員則事體不紊祿不虛費如或額外濫設則萬民惟正
之供不足以充國用多取之則民必困民惟邦本豈可
使之困乎向時冗官滿朝皆無事而食祿中外洶洶為

之不平皇上灼見其弊從廷議而革罷之由是仕途頗清廩祿頗省公道乃行民情大悅即今革罷之徒欲求復進者朝探夕聽東奔西走不得其門而入今太監黃璫奏要留伊弟黃碧在京辦事其事雖小若一允之則倖門從此大開不能復閉豈有不壞平明之治况又有前項欽依事例臣等不敢不言不敢不遵欲將黃碧拏送法司究問以塞弊源緣奉欽依吏部看了來說事理未敢擅便弘治五年十月初五日具題次日奉聖旨黃

碧准改欽天監漏刻博士帶俸不為例欽此

乞貸御史李興處死奏狀

臣伏聞太祖高皇帝諭羣臣有曰忠臣愛君讜言為國
蓋愛君者有過必諫諫而不切非忠也為國者遇事必
言言而不直非忠也比來朕每發言但唯唯而已其間
豈無是非得失而無直言者雖不善無由以聞自今宜
盡忠讜以匡朕不逮欽此大哉皇言乎一哉皇心乎其
所以察言用中以隆聖子神孫萬萬世太平之基本乎

仰惟陛下履太祖高皇帝之位體太祖高皇帝之心於
凡發號施令無非寬仁慈愛惟恐傷人害物是以中外
臣民無不感戴祝願欲聖壽億萬年使斯世斯民享億
萬年太平之福邇者御史李興巡按陝西因公毆死一
十三命刑部會多官問擬徒罪發遣為民今陛下欲處
以死是惡其用刑太重欲懲一戒百以重人命是以肅
殺而行春育也臣不佞但李興之在陝西克盡憲職所
至秋毫無犯貪官污吏強軍豪民間風斂跡不敢縱橫

其有益於地方良民多矣今其所傷雖有此數人蓋欲懲治奸頑初非有意挾私法該徒罪今若處之以死臣恐天下後世以為陛下用刑任情不以法豈不有累至仁至明之聖德且天下貪官污吏強軍豪民所忌憚者惟御史今若此是使御史垂首喪氣而貪污豪強者無所忌憚欲小民獲安四方晏然難矣臣痛惜此事欲言而不敢者累日今臣偶思太祖高皇帝之聖諭是以終不敢默默者蓋為陛下聖德惜而不為李興一小官惜

也伏望聖慈上體天地生物之心欽恤祖宗立法之意
垂莫大之恩宥李興之死重加發遣以正國法以全聖
德天下幸甚臣稽首頓首俯伏待罪弘治五年十月二
十八日具題本月三十日奉聖旨李興打死人命數多
本當處死你每既這等說饒死還著實打一百連當房
家小押發極邊煙瘴地面永遠充軍今後出差御史務
要遵依憲綱而行不許分外生事敢有酷暴如李興的
必處死不饒欽此

乞休致奏狀

臣係陝西西安府三原縣人蚤以民間髫鬣之童選備
邑庠生徒之數二十有六而膺鄉薦三十有三而中春
闈始被選為庶吉士初授職作評事俄選本寺寺副繼
拜揚州知府擢右布政於江西轉左布政於河南疊陞
右左副都御史連遷三部左侍郎至于右都御史尚書
太子少保撫治荊州襄陽南陽三府流民巡撫河南雲
南南直隸三處地方或總理河道或提督巡江或叅贊

機務不一其差委或職司國計或主典刑獄或脩明軍政不一其任用雖不能盡其職分裨補萬一如以一線之微引千鈞之重兢兢業業于四十年之間惟恐有失未嘗一日放此心也幸而行年七十有一荷蒙先帝聖恩賜臣致仕歸田雖棲身衡門之下亦未嘗時刻有忘國家不意誤蒙聖明以臣多歷年所起至於京處以保傳之位寄以銓選之司自惟徒抱忠貞之志而無匡輔之猷况值衰暮之年而寡知人之哲深恐負托不效有

負聖恩是以辭謝至再而不獲命乞休不一而不得去
臣嘗聞昔何曾位極台司不能直諫有誤國事史書其
不忠臣既蒙聖恩委任苟不盡職盡忠何以逃其罪乎
是以有所見聞無不盡心言之雖犯顏逆耳觸忤左右
荷蒙聖明優容亦不加罪此臣之所以日夜感激欲報
無由豈肯假為退托遽欲舍去但臣犬馬之年已至七
十有八血氣衰憊趨走孔艱跪拜喫力委實勉強不去
豈敢妄言況今大朝考察官員在邇觀其各處巡撫巡

按等官開來揭帖中間老疾罷輒不能任事等項官員頗多若不黜退委實誤事使臣考察退之是以老之大者而退老之小者不責已而責人人將謂何又況臣任事日久積怨必多若不及早迴避大恐不能保終伏望聖恩憐臣衰老放臣歸田另選碩德重望之人而任用之庶幾天工不至久曠殘喘得以苟延考察之際人亦無得而議矣臣無任冰兢之至弘治五年十二月二十二日具奏二十四日奉聖旨卿老成重望委任方隆豈

可以年老求退所辭不允欽此

再乞休致奏狀

臣昨伏思猥以庸材劣行誤蒙列聖知遇歷任四十餘年至于崇階顯秩不能上報聖德萬一今已年老力衰乞歸田里奏奉聖旨卿老成重望委任方隆豈可以年老求退所辭不允欽此臣何人仰荷聖恩獎諭眷留若此雖隕首捐軀莫能報酬使臣未至老耄筋強力健每日出入金門瞻望清光退而坐高堂食厚祿率屬供職

夫何為而不願比之歸田之後出入閭里鄉疇無祿而食無僕代勞所見者不過農夫野叟而已夫何樂之有豈肯舍此而就彼哉但臣委實年老氣衰步履艱辛跪拜喫力勉強不去伏望聖恩曲加矜憫容臣解印綬歸田里杜門謝客靜以待盡豈勝感激臣無任瞻望懇乞之至弘治五年十二月二十四日具奏本月二十七日奉聖旨卿年雖老筋力未衰朕已勉留何乃復請不允欽此

議給事中王欽拾補治道奏狀

文選清吏司案呈奉本部送准禮部咨儀制清吏司案
呈奉本部送禮科抄出刑科給事中王欽題前事等因
開坐題奉聖旨該部看了來說欽此欽遵抄出送司案
呈到部看得本官所題廣邊儲以防不虞等事係隸吏
戶二部掌行擬合通行開單移咨煩為徑自施行等因
送司案呈到部今將本官所言逐一議擬開立前件伏
乞聖裁緣奉欽依該部看了來說事理未敢擅便弘治

五年十一月十九日具題二十一日奉聖旨准議欽此

一臣等會同都察院右都御史白昂等查得自宣德年
來至今都察院同僉書管事都御史或一員或二員多
不過三員未嘗有四五員同僉書管事者正統末景泰
初都御史陳鑑王文輪流鎮守陝西回則在院管事其
餘各處巡撫并贊理軍務都御史缺一員則推舉一員
其所推舉者多係曾經歷練老成之人少有不稱厥職
者今給事中王欽題要照依諸司職掌原設左右副都

御史二員左右僉都御史四員選補充足在院協同管事以練達刑名如有巡撫員缺就便挨次差遣一節其意無非欲巡撫官之得人且祖宗之定官制都察院雖設左右都御史各一員左右副都御史各一員左右僉都御史四員共八員想當時在院管事并公差在外者不過此八員而已今在院管事并公差在外巡撫等項常有二十二三員不為不多若再補足員數在院管事以備巡撫差用非惟管事之際議論紛紜政不歸一抑

且輿隸廩祿難以供贍似為未便今都察院見有右都御史白昂右副都御史翟瑄又有左僉都御史李介守制將滿儘可了事合無不必照依額數添除官員今後遇有巡撫都御史員缺本部仍照例會推相應人員請旨簡用如此則官無冗設而法有定守矣 一伏覩各處提調學校御史副使等官節該欽奉勅諭內有曰一學校無成皆由師道不立今之教官賢否不齊先須察其德行考其文學果所行所學皆善須禮待之若一次

考驗學問疎淺及怠於訓誨者姑誠勵之令其進學改過若再考無進不改送吏部別用欽此今給事中王欽題稱前因無非愛惜人才崇重師儒之意合無行移都察院轉行各處提學御史副使等官今後考驗教官務遵原奉勅諭內事理當禮待者禮待之當誠勵者誠勵之當起送別用者起送之不許徇私偏執將一次考驗不中者一概起送別用如此則勸懲不至輕易而師儒知所奮勵矣一查得先該廣平府知府王衡等奏稱

納銀聽叅吏典不諳刑名行移不通楷書算法既以納財為出身之階必以貪財為營家之計奏要今後或遇災傷荒歉先事預防臨期賑卹凡百長策任其施為不許再擬納財叅吏永杜貪利之門等因本部訪得永樂宣德正統年間天下亦有災傷各邊亦有軍馬當時未嘗舉行納糧草納銀兩為監生吏典等項事例糧草不聞不足軍民不聞困斃近年以來各邊并腹裏少有災傷所在守土等官止圖目前分寸之利不為國家長久

之謀輒便奏開生員吏典人等納糧草納銀兩等項事例彼此效尤遂為長策殊不思祖宗教養生員叅克吏役良法美意各有攸在且如生員選於民間俊秀子弟教養於學校成材者科貢入監不成材者克吏為民未嘗不別賢否一概濫進也其吏役亦必於農民之中選其識字能書者充之令其書辦文案及其兩考役滿赴部辦事數年纔撥京考滿日考中纔得冠帶不中者發回為民未嘗不論能否一概入選也近來因有前例是

以在學無志生員及未學富家子弟捏作生員名色不分賢否有無學識一概入監以圖出身將來入仕不知為政之道豈不誤事殃民一切小民不分能書與不能書不論市民與農民一概聽缺充吏不惟官司不得伊書辦文案且於舊制有違及其三考役滿又免考驗一概照依資格出身所以多不稱職比先年間監生止由科貢吏典亦循年資別無雜進之徒是以聽選之人不多選法不至壅滯任用亦多得人自有此例雜進者日

多一日以致正途監生吏典因而壅滯不得出身多者
十七八年少者不下十五六年纔得選用年已向衰誰
肯盡心幹事不謀歸計甚至聽選年老例不入選只與
冠帶閑住又況此等雜途所進中間多有負債破產頑
鈍無耻之輩今日既知以財進身他日豈肯以廉律已
欲不貪財害民天下治安何由可得欲將納銀納糧草
等項事例限本年四月以裏通行停止今後遇有災傷
及邊方糧草不足不許再行奏開前項生員吏典人等

納糧等項事例貽患將來等因弘治元年三月初四日具題奉聖旨是欽此續該四川布政司奏要令陝西等布政司一考兩考吏典定與則例出納銀兩或免其考試就撥京考或給與冠帶各照資格選用等因戶部明知題准今後不許再行奏開前例却乃不令本部知會朦朧題准行移四川陝西雲南貴州四布政司招納去後弘治二年六月內該四川布政司奏稱年歲豐稔本部查照前項禁革事例具題行移該布政司將納銀事

例限七月二十日以裏停止今後諸司衙門敢有再行
奏開前例許本部叅奏或科道官糾劾治罪題奉聖旨
是欽此已經節次通行欽遵外近該巡撫山東左僉都
御史王霽巡撫南直隸左副都御史侶鍾各明知本部
題准再不許奏開吏典人等納銀事例乃敢故違王霽
既開端於前侶鍾又接踵於後戶部亦不查照輒便題
准是使後來雜進人多選法壅滯以致正途循資而進
者皓首不得出身歸怨吏部未必不由此也且吏部掌

天下官吏選授之政令戶部掌天下戶口田糧之政令
選法不清吏部之責錢糧不足戶部之責茲欲補錢糧
之不足遂令選法之不清是自欲逃其責而使人任其
咎也況其所得銀物不及一貴族所積濟人不多壞事
實大且使詔旨不信於天下其為聖政之累夫豈小哉
今給事中王欽所言前因誠可謂深知其弊所宜禁止
合無通行各布政司并直隸府州各行所屬衙門除已
留在官聽缺知印承差吏典挨次叅補外以後遇有名

缺預先三箇月以裏行屬照例於良善農民內揀選身家無過人物端莊諳曉書寫者不必納銀就令叅充其山東南直隸今次奏准納銀事例合無於弘治六年五月麥熟之時就便停止今後各處災傷任從巡撫等官多方區畫措置再不許奏開吏典納銀事例如違許本部并科道官糾劾治罪若該部不行查照朦朧覆奏准行亦聽科道官糾劾如此則典吏進身不緣納賄他年入仕亦必廉能書算文移州縣收臂指之効撥京考滿

冠帶無頑鈍之徒斯吏胥不虞雜進而銓選不致壅滯矣

引疾乞休致奏狀

臣昨於本月十八日引選回家夜半時候忽感風疾頭目昏暈痰氣上壅不省人事者累時已而少蘇四肢麻木不能展轉已將原掌印信咨送本部收掌本部題奉聖旨印還著王恕掌欽此臣有以見聖恩優待大臣之體面無故不棄之盛心且吏部印信臣非不欲掌也一欽定四庫全書

品俸祿臣非不欲食也聖明在上臣非不欲事也天地大德臣非不欲報也但臣年已耄矣時已過矣命已衰矣病已作矣譖毀者日益至矣禍患恐不免矣是以不得不退避也伏望聖慈俯察愚衷曲賜矜憫俾臣早歸田里不致狼狽則是聖恩保全老臣有始有終老臣感戴聖恩無窮無盡也臣無任涕泣懇禱之至弘治六年二月二十二日具奏次日奉聖旨卿朝廷老臣偶有疾宜善調理不允休致欽此

再引疾乞休致奏狀

臣昨因邁疾具本懇乞休致奉聖旨卿朝廷老臣偶有疾宜善調理不允休致欽此伏念臣本凡庸流仰荷聖明起用至此五六年來拜沐殊恩異數多矣非不欲調理疾痊圖報萬一但臣年幾八十血氣已衰百病侵尋如腰腿疼痛耳目昏聩等疾非醫藥所能治療且銓衡之司人才進退所繫天下治忽所關非才識明敏德望過人者焉能勝任而服衆臣以老耄昏聩之人久居

此地有妨賢路其所進退之人又未必一一皆當欲其服衆心而無怨謗得乎然聖恩留臣是乃朝廷禮貌大臣之體面臣非不知也使臣不速去其位誠恐積毀日深獲罪愈重斯時也聖恩雖欲留臣亦恐不可得使臣狼狽而歸有何顏面復見鄉邦故人豈若今日之去之為美也伏望聖慈俯賜矜察容臣歸田使臣無憂無懼苟延殘喘數日其視今日留臣之恩豈不尤為大乎臣無任感仰之至弘治六年二月二十四日奏二十六日奉

聖旨卿引疾求退已有旨勉留不必固辭欽此

乞休致奏狀

臣先任太子少保南京兵部尚書叅贊機務致仕之時
年已七十有一退居田里歲且將周誤蒙聖恩召至京
師陞吏部尚書加太子太保俾之視事時已七十有三
矣茲又食保傅之祿典銓選之政將及六載累蒙殊恩
異數難以備述雖捐軀隕首莫能報酬萬一但血氣日
衰桑榆景迫任既重而勢必危功未成而謗即至深惟

保晚節之難將恐為平生之累是以五六年來乞休二十餘次俱蒙聖恩勉留不允其去今舊患腰腿疼痛兩足浮腫等疾未瘳而新染心疼氣急驚悸不寧之證益劇有若風燭晨星豈能長久伏望聖恩憐臣年垂八十一歷事四朝雖無奇勲異績亦嘗宣力効勞容臣致仕歸田全其始終非惟臣一身感恩於無窮而在廷大小臣僚亦相勸勉願輔太平之治於無窮矣臣無任悚懼之至弘治六年閏五月十三日具奏次日奉聖旨卿既稱

有疾且加調理不允休致該部知道欽此

再乞休致奏狀

臣昨以自召用以來五六年間乞休二十餘次俱蒙聖恩勉留今舊疾未瘳新疾又作恐不能長久伏望聖恩憐憫容臣致仕用全始終仰惟皇上雖憐其老疾亦不忍遽舍其去乃降溫詔令臣且加調理此乃聖帝明王愛物之仁不棄故舊之盛心也臣雖昏愚豈不知感但臣之獲此疾也非一日矣雖少且壯者亦難為調理今

臣老且衰死將至矣豈醫藥所能療乎伏望聖慈矜其愚憐其老哀其死將至容臣歸田有始有終其為感激寧有窮乎臣無任隕涕懇禱之至弘治六年閏五月二十一日具奏次日奉聖旨卿既懇辭准致仕著馳驛去還著有司月給食米二石歲撥人夫二名應用該衙門知道欽此

王端毅奏議卷十五

介菴奏議序

古有謨若禹曰克艱臯陶曰知人安民益曰無怠無荒迺臣告君之嘉言爾後之章奏即謨也其紀綱之大體義理之至情政事之要道具於是關係大矣哉蓋自古人君莫非忠臣弼而朝廷正天下理以經綸大經謀猷大業天工其代股肱倚畀不可相無而相舍故用其言則國福以興棄其言則國禍以亂若龜筮之孚灼然而不誣者然臣必能盡其忠俾君其堯

舜君民其堯舜民庶幾無負所任而亦不過為分內也何忠者為麟角為鳳嘴斬斬乎不多見邪忠其難矣乎夫忠者盡其所當然而無歉焉爾盡已則盡物盡物則盡道非循天理弗能也非持大義弗能也非抱貞固弗能也非純誠不欺弗能也非剛直不阿弗能也非大公無私弗能也能焉則政無不舉知無不行陳其善閉其邪利害當機極言無諱已不求知而自為人不見知而不悔烏有嫌疑窺避哉盡已而已

矣若今大司馬陝右王公其人焉公號介菴歷事三
朝敷歷中外幾四十載讜論滿朝廷忠名滿天下始
評大理平反克允刺揚州吏民赤子布政江西河南
長城數千里撫荆襄撫中州總河防撫雲南守陪都
撫南畿安危康濟居司寇居司徒居司馬都臺憲佑
辟經邦前後章疏餘二百上真大體立於紀綱至情
切於義理要道深於政事偉哉言乎古人之心也使
今征求息而民力甦權姦伏而士氣作君心明而成

憲彰是誰之功歟蓋公存心以道始末惟忠蓄有學問本源施為實用其厚如此所以揚翹特立風采凝峻盛德休望光明正大為國之楨也詩云袞職有缺惟仲山甫補之公其謂歟書曰政貴有恒辭尚體要今公之言忠誠剴切流出肺腑而無繢繪之浮辭可謂深得乎體要者矣將見千載之下讀之者未必不與陸宣公之奏議諸葛武侯之出師二表並稱也耶公懋辱厚公雅敢以荒謏辭謹載拜序其槩成化十

八年壬寅十二月吉日無錫陳公懋書

書介菴王公奏稿後

往在憲宗朝聞三原王公為南京部臺章奏迭至奉
旨施行者固已錄之有司播之四方其留中不報者
世莫得而傳也公既為今天子簡用復起為吏部有
傳其家所藏奏稿者蓋自為評事為知府為布政凡
所嘗陳奏舉劾者皆在焉觀其剖析事理論法斷獄
人或能之至於批鱗苦口排大姦摧巨敵身任天下
而不為私謀者則卓乎不可及也夫內告外順見于

君陳之命先儒以為此固成王之言非文武之言也
中古之世或匿諫草而不以示人甚則焚之世俗相
傳以為美事議者則以為孔光之徒匿姦釣譽之為
者故韓魏公諫垣存稿寧不避賣直之嫌而彰人主
從諫之美豈無所見而然哉若王公所諫奏所舉劾
盖有削兵權黜侍近而元惡大憝亦有肆諸市朝者
則公之忠先帝固鑒之深矣雖有危言極論未暇宣
布然亦優而容之未始有譴怒訶責之語盛德所在

亦豈容掩而不彰哉使天下傳之後世傳之謂公之言如此而先帝之所以容之者如此則未必非是稿之助也弘治壬子四月六日中順大夫太常寺少卿兼翰林院侍講學士經筵講官兼修國史長沙李東陽書

王端毅奏議後序

新刊介菴奏議後跋

大冢宰三原王公清忠大節著天下章縫士識與不識莫不知推尊之顧其平生章奏往往傳聞于人而全帙多未之覩慕公者蓋日企焉久矣侍御東魯王公往使關中以風節高峻為公所期重且道雅相合因錄得疏草二百餘篇每攜自隨茲奉命按江南激揚之暇思欲廣之以資有志事功者因謂我郡守林侯曰三原公一代耆德固今後輩楷模况敷歷既久

所建明多地方事亦司風紀者之所宜習也盍刻而傳之俟勵精郡政雅志遠大欣然請捐俸督其成以余之居郡下也遂授而俾編焉魯魚亥豕微效刊正得八十六篇釐為六卷其再起為吏部時撰又不在是大凡校編事宜皆請質二執政而後定眇焉末學直董書而已既成復承命志所由刻古語云惟賢知賢信然哉公之大勲業自筆太史固非愚生之所敢論侍御公按茲周稔執法秉公始終一心而侯篤尚

惠愛以風化率下皆所謂三原公之徒歟且公桃李
滿門晚得相知乃更在四海之內則知君子道同則
合雖千載猶金蘭契非是鄰牆旦暮而後相為謀也
侍御公言公引年家居後在邑城外數里許築草堂
日著書其中以為課今年垂九十而聰明强健好學
不衰且增廣古今章疏甚富其自得而不忘世又如
此公又間語侍御公曰士大夫是劄得脚住然後可
以有為亦名言也敢併志云弘治十五年歲次壬戌

十一月望日後學吳郡楊循吉拜手謹書


介菴奏議六卷舊刻之姑蘇三原公故里也公逝矣
時縉紳知公者重其名思其手澤之新惟公不可見
得見是集也斯可矣然乃不能應諸縉紳之求乃曷
廣之乃因舊本別為三集逾冬工始刻成讀其辭直
而不矯婉而不隨危而不激仰承俞允播宣中外時則
有若削兵權出侍近誅大奸惡以丕覃聖化華夏夷
服想望風采是固聖明從諫好善之懿夫其轉移乎
動果敢剴毅公之精微固自有不可及者公歿之明

年啓充來尹三原又三年奏議重刻說者謂公之質
直如長孺心事如希文奏疏如包孝肅好學如衛武
公表正鄉閭如陳太丘一時出處屹然朝著俾善類
賴以有立是集也猶吾足徵也惟公不可見得見是
集也斯可矣遂藏棗于弘道書院併志歲月以傳正
德七年壬申冬十有二月賜同進士出身知三原縣
事嘉州後學程啓充拜書

書王端毅公奏議後

耿文恪公居太宰有譽公可繼端毅公者文恪公曰
王公孰可當之其在位吾夕過其第必見蒼頭沽油
也銑先公守延安考滿考功郎中佐持牘上王公曰
汝未盡斯人之節邊吏率自潤斯人約身裕民歲歎
止徵坐是停祿恒餒其妻子公乃自署考曰清白之
操詳明之政次日先公堂辭謝曰某遠郡吏何由辱
公之知公曰吾諸子留三原鄰郡惟君無問遺爾秋

日檢書覽公奏議擊奸守法一介弗撓乃籍上事嗟
乎元臣勛名固不以巧辭飾行而取哉嘉靖甲午秋
日相臺崔銑書



王端毅奏議後跋